



本著作以創用CC「姓名標示-非商業性-禁止改作」4.0國際授權條款釋出。
詳細授權條款，請至 <http://creativecommons.org/licenses/by-nc-nd/4.0/>。
資料來源：教育部電子報「閱讀趣聞客語」專欄 <http://epaper.edu.tw>。

客（四縣）／生活／☆☆★★

仙草花同仙草茶

你敢係同佢共樣，食咗半生人个仙草，乜毋知仙草係生到圓个？還係扁个？舊年十二月仔，佢去楊梅个仙草花節，看著一大坵一大坵个仙草田裡肚，滿坪都係粉吊菜色个仙草花，佢正知，原來，仙草个葉仔生到像薄荷，仙草花就像係長形、幼秀个七層塔花。十二月仔个風拗蠻冷，無多人个腳膝頭恁高个仙草，笑等分風交；佢試著會冷，行去田脣个攤仔，買幾杯仔燒个仙草茶好分屋下人食燒。

「試睇看啊！這香氣，無共樣哦！」頭家講。

頭家人正經客氣，佢就講愛同佢買地，佢還係叮叮啞啞一細杯仔分佢試睇。確實，這仙草茶異有香氣。佢看頭家用仙草滷个滷卵，烏金烏金仔異得人惜，乜順續仔買兩盒。

「這仙草，係前幾年仔改良个新品種，安到桃園2號又安到『香華』。佢較多工，愛像摘茶恁樣，細心細意个摘一芯兩葉起來，毋過，一年做得收幾下到哦！有香啱？」頭家講。

安到「香華」个仙草，香氣異單純、留在喉嚨頭个回甘異有氣質。雖然風異冷，毋過，做得企在仙草田脣看靚靚个仙草花，買著伶俐个農家人做个仙草產品，又聽著煞猛个耕種人同 耐心个介紹仙草，來楊梅這輪，實在異值！

就可惜，平常時買「香華」毋著！隔兩禮拜仔，佢會去關西、新埔買一轉菜，看人家在關西農會个新農民市場，一大包一大包个仙草乾撈，佢乜學人買一包轉去。煮仙草茶較該，仙草乾洗淨來放在鑊肚、水沾(dem)過仙草乾，放佢煮，煮好濾過就好地。毋過，凝仙草佢就無計地！愛仰仔凝？愛放幾多粉仔？佢全毋曉得。

人講「懶人有懶計」：煮好仙草茶，無板帕好濾，就用泡咖啡个濾紙來濾；做仙草，毋曉得凝粉仔，就照果凍粉个說明書，幾多仙草茶放幾多果凍粉落去。打早，佢就煲好一大鑊个仙草茶，想愛裝暖壺燒燒咁个人就裝在暖壺，伸个，同佢放冷、冰起來，無就拿來做仙草。天時愛寒愛熱，佢奈佢毋何，毋過，煲仙草茶分屋下人降火氣、穩定血糖，佢做得到，盡無，凝凍个仙草拿來攞糖水、攞牛乳、無就打淨食，乜有好食一肚飽！一杯又純又淨个仙草茶，就係佢一個做阿姆人對屋下人簡單个守顧。

作者：彭瑞珠

☆詞彙學習☆

【無多】moˋ doˊ：不超過。

【較該】ka goiˊ：比較容易。

【分風交】bunˊ fungˊ kauˊ：被風吹襲。

【濾】li：濾。

【滷卵】lo lonˋ：滷蛋。

【暖壺】nonˊ fuˋ：保溫瓶、保溫罐。

☆文法學習☆

【敢係】gamˋ he：難道是；反詰的語氣詞，即難不成的意思。

例1：這屋仔，敢係佢起个？（這房子，難不成是他蓋的？）

例2：你敢係阿明？佢強強認毋著地！（你難道是阿明？我幾乎認不出來了！）